

Fasnachtsclique Verschnuuffer Stamm



VERSCHNUUFFER

Si wänn jo nur spiile

Wenn Du im Wald goosch go spaziere
no ka s Dir guet und gärn passiere,
dass s bletzig an der Waade zwiggt
well so-n-e Hundeviech usstiggt.

Kasch kurz und düttlig exprimiere,
De wurd sch das so denn nid gouttiere
zwar en Exgüsi estimiere,
doch lieber s Viech exekutiere.

“Är wott nur spiile” heersch denn saage
am liebschte wurd sch däm Viech an Graage!
Mit wäm und wenn Du spiile wottscht,
bestimmsch nur Du, nid soone Dotsch!

Selenski und Maduro hän
au miesse spiile, ob si wänn
oder au nid het niemerts gfroggt,
vo Bär und Adler wird dört bloggt.

Au Taiwan het sich do drin tosche,
wird bald vom China-Drach verdrosche.
D EU-Angschthaase proteschtiere
und mechte Widerstand probiere.

Ai beese Bligg vo däne Drey
und furt sin d Haase mit vyyl Gschrey.
Si blybe still, sin gryydebleich
und hoffe, dass s en andere braich.

S hän Macron, Merz oder Meloni
grad gar kei Plan und s goot nid ohni!
Statt gmainsam Stärggi demonstriere,
göhn sy die Psychos go hofiere!

Der Merz het d Schwoobe nid im Griff
es fählt der Dampf und au der Pfiff.
Zum Motto wird dert Black und Decker:
d Vulkanos zien z Berlin der Stecker.

D Franzose wänn als Ainzigis wisse:
Het äggscht der Macron si voll bschisse?
Isch aich die mit de lange Franse
zwar scho sy Frau, aber e Transe?

Au d Däne hän e glai Problem:
der Donald findet Grönland scheen.
und wien e Buschi tscheggt är s nid:
Dass git s für ihn jetzt aifach nid!

S sin Aastand und Respäggd vergässe
und s zellt nuur s aigene Inträsse.
Und über s Völggerrächt wird glacht,
s sin wirgglig Tier grad an der Macht!

Der Xi, dä isch als Drach vyyl z plump,
als Adler z fett, der Donald Trump,
der Putin isch als Bär vyyl z glai
und trozdam isch das ainerlei!

Si wärde vo der Gmainschaft ghasst
und mache aifach was grad basst!
S het offebaar im Hintergrund
gnueg Profiteur, das isch nid gsund!

Ob Kaiser, Keenig oder Zar,
si wäre so gärn Superstar!
Doch sin si numme Terrorische
und gheere alli Drey in d Kische!

Dert gheere si denn grad verwaart
e Therapie wär do vyyl z zart
und ussichtslos, das isch ganz klar.
Wie wär d Wält wider wunderbar!

Au z Israel und im Iran
in Libye und im Sudan
wird kämpft um Öl und au um Land
fählt däne allne der Verstand?

Der Grund vo däne Grieg, de vyyle,
sin alti Männer, wo wänn spiile.
Es mache Adler, Drach und Bär
em EU-Angschthaas s Lääbe schwär.

Mit Spiile het das nüt mee z tue
die alte Segg gänn nie meh Rueh.
Me sott ene der Arsch versoole
und denn soll si der Teyfel hoole!

D Ladäärne-Uusstellig uff em Minschterplatz und d Waage-
und Reggwisye-Uusstellig bi dr Kasärne sin vom Mään-
tig znacht bis am Mittwuch demoorge! Deert und an de
Verkaufsständ (CINS) in dr Stadt ka men au alli Zeedel und
Schnitzelbängg und d'Blagedde kaufe.

Bisch e Kind, mechtsch Fasnacht mache, denn gits kaini
halbe Sache!
So schrib denn unseri Obfrau aa und mäld Di gschwind zem
Yschtoo aa.

Yneluege: Samschtig 7.3.2026
11.00 – 13.00 Uhr im Cliquekäller an dr Malzgasse 9 in Basel

Mir fraie uns uf Di!

Fir Informatione mäldsch Di bi dr Obfrau:
Céline Ryffel, Verschnuuffer Gnepf,
Malzgasse 9, 4052 Basel
E-Mail: gnepf@verschnuuffer.ch